

Воскресные стихиры на стиховне, глас 2:

Господь воцарися, // в лепоту облечеса.

Древом, Спасе, упразднил еси / юже от древа клятву, / державу смерти погребением Твоим умертвил еси, / просветил же еси род наш востанием Твоим. / Темже вопием Тебе: // Животодавче Христе Боже наш, слава Тебе.

Ибо утверди вселенную, // яже не подвижится.

На кресте явлься Христе пригвождаемь, / изменил еси доброту зданий: / и безчеловечие убо воины показующе, / копием ребра Твоя прободоша, / евреи же печатати гроба просиша, / Твоя власти не ведуще. / Но за милосердие утроб Твоих, / приемый погребение, // и тридневен воскресый, Господи, слава Тебе.

Дому Твоему подобает святыня // Господи, в долготу дний.

Животодавче Христе, волею страсть претерпевый смертных ради, / во ад же снизшед яко силен, / тамо Твоего пришествия ожидающия / исхитив яко от зверя крепкаго, / рай вместо ада жити даровал еси. / Темже и нам славящим тридневное Твое востание, // даруй очищение грехов и велию милость.

Слава, и ныне, глас 2:

О чудесе новаго всех древних чудес! / Кто бо позна мать без мужа рождшую, / и на руку носящую всю тварь Содержащаго? / Божие есть изволение Рождшееся. / Егоже яко Младенца, Пречистая, Твоима рукама носившая, / и матерне дерзновение к Нему имущая, / не престай молящи о чтущих Тя, // ущедрити и спасти души наша.